

4

SOLEMNITE  
DE LA  
CANONIZATION  
DE  
SAINCT IGNACE

DE LOYOLA FONDATEVR

de la Compagnie de Iesvs, & de

François Xauier de la mes-


me Compagnie, faicte


à Bourdeaux.

BIBLIOTHECA NAZAR  
ROMANA  
VENERIO EMANUELE



A BOVRDEAVS,  
Par IACQUES MILLANGES, Im-  
primeur ordinaire du Roy, 1622.





CANONIZATION.  
**SOLEMNISEE**  
DES SS. IGNACE DE  
LOYOLA ET FRAN-  
çois Xauier.



E succès heureux de tout ce qui s'est passé à Bourdeaux durant la solennité de la Canonization des Saints Ignace de Loyola, & François Xauier au College de la Compagnie de Iesvs, monstre clairement, que le dessein qui enauoit esté prins, a esté conduit & mis à chef par vne speciale prouidence de Dieu, & faueur doublement

paternelle de ces deux très-glorieux saints : & que le retardement de ceste célébrité, a esté comme vne imitation de la nature & des arts les plus parfaicts, qui (au dire du Roy des peintres) ont besoin coustumierement de temps, & ne haïssent rien tant que la contrainte; laquelle me force neantmoins d'estre court pour le present, n'ayant autre loisir, que de parcourir iour par iour par vne narration succincte, la huictaine des iours employez en ceste célébrité, à la splendeur, majesté, & religion de laquelle il semble, que le ciel & la terre ayent fauorablement cooperez.

Car premierement le R. P. Coton Prouincial de la Compagnie en Guyenne, ayant assigné au dixiesme de Iuillet la Congregation Prouinciale, qui se tient de trois ans en trois ans : tous les Peres qui la deuoient composer se rendirent opportunement à Bourdeaux. Le nombre signalé de ceste religieuse Assemblée, & la qualité de leurs personnes, ne pouuoient sans doute, que faire croistre tout le reste de l'appareil qu'on faisoit, & donner

vn grand lustre à la solemnité. Mais l'ar-  
riuée en cette ville de Monseigneur l'Il-  
lustrissime Cardinal de Sourdis qui fust  
sur la fin de ladicte Congregation , ad-  
uança beaucoup plus l'affaire, & confir-  
ma parfaictement l'esperance que nous  
auions pour le faict de la procession en la  
bien-veillance du Clergé. Quatre de  
nos Peres donc des plus graues furent  
deputez de toute l'assemblée pour l'al-  
ler saluer à son Palais , luy congratuler  
de son heureux retour, & le remercier  
tres-humblement de la faueur signalée,  
qu'il auoit faict à nostre Compagnie à  
Rome par les beaux & illustres eloges,  
qu'il pleut à sa grandeur & pieté de don-  
ner à nos deux saincts. Ce tres-illustre  
& très-religieux Prelat ayant reçu fort  
courtoisement & paternellement nos  
Peres, se ietta sur les loüanges de la pru-  
dence, du conseil, mansuetude, & don  
d'oraison de N. R. P. General; & apres  
auoir entendu que le 24. de Iuillet es-  
toit le iour destiné à nostre solemnité,  
non content de l'auoir faict celebrer  
quelque mois auparauant en son absen-  
ce par lettres expresses qu'il en escriuit

de Rome à son grand Vicaire Monsieur Miard, ny mesme de faire publier le bref de nostre tres-sainct Pere le Pape Gregoire xv. portant octroy d'indulgence pleniere pour le iour de la premiere solemnité de ces glorieux saincts; fut d'aduis que ce iour fust assigné au 25. du mois dedié au bien-heureux Apostre S. Iacques patron de nostre Eglise. Et à ce que la feste en fust plus celebre, & la deuotion plus frequente, voulut luy mesme y mettre l'oraison des quarante heures, le Dimanche precedent. Et de plus ordonna, qu'à mesme iour procession generale seroit faicte de tout le Clergé tant seculier que regulier, depuis l'Eglise metropolitaine de S. André, iusques à celle de nostre Cōpagnie. Ce qui fut executé, ainsi que nous dirons tantost, avec plus de satisfaction de tout le peuple, que l'attente, quoy qu'extremement en auoit esté grande. Telle fust la belle ouverture que le zele de ce grand Prelat fit à la gloire de cette celebrite. Les tres-auguste Senat & Parlement de Bourdeaux, aduertys de cette deuotion &

deuëment informé comme son ieune Clouis auoit esté l'un des premiers promoteurs de cette canonization, symbolisant, selon sa louable coustume, à toutes les affections & inclinations de son Roy nostre souuerain Prince, resolut & arresta de commun aduis d'honorer la procession de sa presence, & ce en robe rouge, marque signalée & de sa pieté enuers les saincts, & de l'affection singuliere, dont il luy plaist obliger nostre compagnie.

Le concours de ces choses avec l'appareil de la feste fut secondé de la faueur du Ciel: car les chaleurs ayant esté exorbitantes les iours auparauant, la matinée neantmoins fut fraische, les nuës s'estant emparées de la moyenne région de l'air, commodité qui dura iusques à la fin de la procession, qui commença de cette sorte.

Le Dimanche à cinq heures du matin, nos Escholiers s'estans assemblez & disposez de classe en classe selon l'ordre qui leur auoit esté prescrit, sortirent de la grand' Cour du College, apres le signal de la Croix qui marchoit en teste, &

chaſque Regent reueſtu de ſurplis ſuy-  
uoit ſa claſſe. Les nouices de noſtre  
Compagnie cheminoient deux à deux,  
nos freres coadiuteurs de meſme, puis  
les autres freres & Peres en nombre de  
cent & dix, qui ſe ſuyuoient immediate-  
ment en toute modeſtie & deuotion.

Ils entrerent en l'Egliſe metropoli-  
taine par la porte du Ha, & ſe rangeans  
par ordre, remplirent toute cette gran de  
nef. Monſieur le Cardinal y arriua  
avec ſon Clergé, & ſoudain après, tous  
les Ordres Religieux. La Meſſe fut dicte  
en Muſique en la preſence de mondit  
Seigneur, & Meſſieurs du Parlement,  
& ſur la fin ledit Seigneur Archeueſque  
benit les deux eſtendars ou bannieres,  
l'une en peinture ſur du Tabis de ſoye  
cramoiſie, l'autre en broderie en fonds  
d'azur, où les deux ſaincts eſtoient naiſ-  
ſement repreſentez. Celle qui demeura  
pour eſtre ſuspendue en la voute, eſtoit  
de cinq pieds de hauteur, l'autre de ſept  
& cinq de large portée ſur des picques  
ſemées de fleurs de lys: au bas releuoiet  
en riche broderie les armes de noſtre S.  
Pere d'une part, l'autre celles de ſa Ma-



jesté, & au milieu le tres-illustre nom de Iesus en fonds d'or, entouré de rayons. Deux houppes à crepines de soye pendoient aux deux extremittez avec cordons propres à regir l'estendart contre l'effort du vent, & au bas des creneaux ou clochettes estoient des pommes d'or suspenduës, qui dōnoient grace & lustre à la banniere.

Le R. P. Prouincial accompagné des huit Peres qui deuoient porter & accompagner l'estendart successiuement à cause de sa pesanteur, estoit entré dans le Chœur, tant pour assister à la susdicte benediction des estendarts, que pour rapporter le plus grand, & apprendre de la bouche de Monseigneur le Cardinal l'ordre de la Procession, qui soudain par son mandement commença par les Escholiers, à la maniere qui suyt.

En premier lieu les sixiesmes, suyans vn grand Crucifix d'argent, porté vn peu hors de leur corps par vn seminariste de mondict Seigneur, auoient pour liurée particuliere les trois couleurs de l'arc en ciel, qui paroissoient dans leur guidō tout parsemé de fleurs de lys avec

cette deuise en lettre d'or. *Sic honorabitur quem rex voluerit honorare.* Faisant allusion tant celuy-cy que les autres à la pieté singuliere, qui auoit meu nostre Roy victorieux à procurer si Chrestiennement la canonizatiõ presẽte. Celuy qui le portoit estoit accoustré richement, l'espée argentée au costé, le pennache ondoyãt iusques sur les espaulles. Prés de luy marchoient deux autres tous deux de mesme grandeur & habillez de sa couleur, sauf la deuise de leurs guidõs, qui estoient deux portes de celles que veist S. Iean dans les Cieux, l'vne representant l'Occident reparé par S. Ignace, & la secõde l'Orient illuminé par S. Xavier. A deux pas de ces deux-cy venoit tout seul vn Cherubin reuestu à l'Angelique, & tout luisant de pierreries de la celeste Ierusalem, avec la baguette d'argẽt en main. C'estoit l'Ange conducteur d'vne troupe de Vertus qui le suyuoient en habit, qualité, contenance, & desmarche de deesses. La Foy tenant la main droicte à la perruque flottante sous vne couronne d'or entortillée de rubans incarnats, & grellée de diamans, auoit sa robe de

couleur celeste , & portoit en main vn Crucifix. L'Esperance habillée de son vert, estoit à sa gauche non moins richement parée , toute couronnée d'esmeraudes, & portant vne branche de laurier argenté. Suyuoit la Charité après, ornée du tout à la Royale , d'un veloux cramoisi à fonds d'or, avec vn cœur enflambé en main. La robe de la Chasteté couronnée d'un tortis de perles , estoit toute de satin blanc tenant pour son sceptre vn lys; sur lequel se pouuoit lire le nō de nostre chaste Roy , LOVYS, OV LYS. Vne Amazonne toute descheuelée & en cotillon , à la manche retroussée sous vne rose de diamant , le bras & le coute-las tout nud , tenoit la place de la Fortitude. La Iustice avec les balances, & la simplicité de sa robe quoy que riche , se faisoit voir à trauers le crespé qui luy bādoit les yeux. La Temperance auoit pris en main vne branche d'oliuier , & pour faire rougir le monde en descouurant sa vanité, & se mocquant de son inconstance muable , s'estoit vestue d'un tafetas changeant. La Prudence, la Patience, & la Pudeur, parées toutes trois de couleur

rouge, estoient distinguées par leurs blasons: celle-là portoit vn miroir, celle-cy vn rameau de palme, & la troisieme vn bouquet de fleurs. Vne robe de gaze d'argēt estoit l'habit de l'Oraison, tenāt sa droicte sur la poictrine, & vn liure dās la gauche. La derniere nommée Perseuerance, auoit son manteau de damas, croisé de larges clinquans d'or avecques la frange d'argent qui traïsnoit bien bas iusqu'en terre, monstrant le prix de sa valeur en forme d'une pretieuse couronne. Au reste la grauité, modestie, & majesté, avec laquelle marchoit tout cet ost, faisoit croire que ces Vertus estoient descenduës des Cieux pour honorer les saincts en terre. Et à cecy aydoit encore la compagnie de douze Archāges, qu'un Seraphin conduisoit, portant deuant eux vne lance garnie de son guidō bleu tout semé de fleurs de lys d'or, avec l'inscrip-  
tion, GEMINI SERVANT HAEC LILIA SOLES. Cette troupe triomphante auoit en queue la militāte, représentée par douze enfāns, habillez en capitaines, l'espée dorée au costé, la plume blanche à la teste, la botine à la jambe, & la gaule à la

main. Leur guidon meſlé de blanc & de rouge, ſignifioit que par le ſang & la peine, les ſaincts auoient touché au blanc de la gloire, & du repos. Tout le demeurant de la claſſe fort honneſtement couuert, conduit par vn ſixieſme eſtendart de la couleur du premier portoit vn cierge blanc en main comme leur Regent qui les ſuyuoit.

A la teſte des cinquieſmes, paroifſoient quatre guidons accompagnez de leurs Anges ou genies, magnifiquement accouſtrez. Leurs eſtendars chargez les vns de couronnes en broderie avec ces trois mots de l'Apocalypſe. *Feciſti nos Deo noſtro regnum* : & les autres de deux ſceptres d'or couchez en Croix l'vn ſur l'autre, ſoubs vne couronne fermée, avec l'inſcription. *Regnabunt in ſæcula*. eſtoient de taſſetas bleu. Car telle eſtoit leur couleur, conuenable à ceux qu'ils conduiſoient, c'eſtoient vingt quatre ieunes enfans representans les vingt quatre Roys, que S. Iean apperceut en Paradis, ſejour de jouuence immortelle. Il faudroit bien de riches veſtemens pour eſtre auſſi bien parés que ſont les

Royz du Ciel, si est-ce, que ces enfans auoient à peu pres ce que portent les Roys de la terre. Leur casaque de gaze d'argent où de toille d'or, estoit faicte à la Romaine à guise de trabée triōphale, leur battant iusques au genouil, dont les bandillons en lieu de rassettes & haut de mèches, partie en ondes, partie en escailles, estoient bordezz de galō d'or. L'attour de leur tresse flottante admirablement pretieux esclattoit de brillās sans nōbre. Mais les courōnes qu'ils portoient en la gauche, estoient autant de riches thresors; comme les luts, qu'en lieu de harpes ils tenoien chascū en la droicte, leur donnoit vne merueilleuse grace. Il n'y auoit pas iusqu'aux botines qui n'eussent leurs roses de perles. Pour le reste de ceste classe, qui estoit de sept à huitvingts escoliers, dont la pluspart s'estoit faict faire des habits tout expreslemēt, ils portoient dans vne main vn cierge blanc, & dans l'autre de belles heures. Leur guidon à la couleur bleuë parsemé de fleurs de lys d'or, asseuroit sa Majesté de la part de S. Ignace par cet Anagrāme heureux.

*Ignatius de Loiola. Deo tua lilia signo.*

Les quatrièmes qui auoiēt entrepris de marier la constance avec la Virginité, & le sang des Martyrs avec le lait des Vierges, auoient le rouge & le blanc pour couleur de leur premier guidon, dans lequel vn cœur embrasé, à guise de Salamandre subsistoit dans les flammes. Il estoit suiuy de douze enfans, des meilleures maisons de la classe, qui auoient emprunté les noms & vestemens des martyrs, comme de S. Laurét, de S. Vincent, S. Sebastien, & autres, desquels ils representoient le courage, par les marques & instrumens de leurs supplices. S. Estienne comme le chef de tous, à la teste couronnée d'une infinité de pierres pretieuses, estoit reuestu en diacre d'une lōgue aube dantelée, & d'un courtibaut de satin rouge par dessus. Son guidon de mesme couleur portoit vn espee flamboyante & toute entourée de feux, publiant par sa deuise (*igne & ferro*) que c'est par la violence que l'on emporte le ciel. Deux autres qui l'accompagnoient auoient pareillement deux guidons rouges, partageans par la moitié la sentence de Tertulien. *Sanguis martyrū, Semen*

*Christianorum.* Au milieu dequoy estoit vn rosier. La troupe de Chasteté composée de douze Vierges, les vnes habillées de satin ou de damas blanc, & les autres de rezeul ondé & plissé d'un bel artifice, toutes attifées d'un thresor de perles, portoiēt en peinture vn miracle de nos saincts, dans vn tableau fait en oüale, & voilé de gaze d'argent. Leur Princeſſe marchant la premiere portoit l'estendard tout blanc, où se voyoit vne hostie souſtenuë sur vn calice entouré de cette deuise sacrée. *Vinum germinans Virgines.* Aupres d'elles deux petits pages portoiēt aussi deux guidons blancs avec vn lys en broderie. Autant de martyrs, autant de Vierges, & autant de Vierges autant d'Angeſ qui ſuyuoient apres celles-cy comme leurs freres germains, ou fidelles proteſcteurs. Leur banderole estoit aussi blanche brodée d'un nom de IESVS. Pour le reste des eſcholiers, & en grand nombre, & tres proprement couuers, que douze autres guidons conduisoient, disposez & placez entre eux, tāt le flambeau qu'ilſ tenoient en main, comme l'attention à garder leur ordre, joint en-

core



core leur maistre qui les suyuoit , les maintenoit en modestie.

Les troisiemes venans apres estoient diuisez en trois bandes. Ils auoient pour leur dessein de représenter le Zele des ames, dont le guidon estoit rouge portât les figures des saincts , trauaillées en riche broderie. S. Ignace regardoit vn Crucifix d'un costé, & S. Xavier vne nostre Dame de l'autre, tout le reste estoit ramagé de fleurs.

A la premiere bande donc , le Zele à guise d'un Prince, couuert de brocatel d'or, l'espée flambante nuë en main , & l'aigrette avec la rose de diamant à la toque , marchoit entre quatre genies, qui tous dessus leurs cuissins , couuerts d'une gaze d'or pendant de deux costez en terre, portoient des presens conuenables aux quatre parties de l'vniuers, dont ils se disoient gouuerneurs. Le premier aux cheueux dorez, auoit trois beaux lys d'argent , comme le plus riche thresor qu'il aye à garder en Europe, les recommandant ainsi à deux Astres beffons.

*Felices his influxus date, sydera fratres.*

Le second au poil retors & crespelé à

la moresque, auoit quelques pommes d'or, comme celles des Heſperides , où eſtoit engraué ce vers , qui auoit creu avec elles.

*Hæc Sancti, Lodoice, tibi poma aurea ſeruant.*

Le troiſieſme au teint delicat, auoit des dattes d'Idumée, enucloppées de feuilles de palme , & à l'entour ce mot Prophetique,

*Has poſuit Lodoicus, & his Lodoice fruëris.*

Le quatrieſme à demy voilé , ne ſe voyoit auſſi qu'à demy, ſon habit ſentoit le Sauuage. On voyoit pourtant qu'il ſe vouloit ciuiliſer, & quaſi demander au Zele de rendre bien toſt le Roy de France victorieux de ſes rebelles, par la faueur de ſes deux patrons , pour voir iuſques dans l'Amerique l'eſtendart de la ſaincte Croix planté par les armes de France. Apres ces quatre principaux, vn autre guidon tout bleu, faiſt pareillemēt en broderie, menoit apres ſoy les genies des Prouinces, & Royaumes particuliers, portant de meſme leurs preſens pour en faire hommage aux ſaincts. Le guidon de la ſeconde bande de taffetas incarnat, auoit comme le premier les deux bien-

heureux en broderie, auxquels cet Anagramme de bon-heur attribuoit le bon-heur de France.

*Ignatius de Loiola, et Franciscus Xauierius.*

*Vos Regni Custodes, Francie Lilia auxistis.*

Ce que sembloient confirmer les douze escoliers suyans, representans les douze Apostres, & cela aussi naïfement que le pinceau pourroit faire. Outre les instrumens de leurs martyres, & marques de leurs offices, pour honorer la feste des deux saincts leurs imitateurs, ils porttoient vn tableau faict exprés contenant les beaux faits, & miracles d'iceux. S. Pierre à la triple tiare toute brillante de rubis, & fermée en haut par vne croix de cristal, tenant les clefs du Paradis en main, auoit pour deuise ces mots,

*Cælorum, Lodoice, tibi seruamus honores.*

Et S. Paul son collateral conspirant au mesme dessein auoit escrit sur son espée.

*Et meus hic terras ensis dabit.*

Tous les autres avec semblables deuises, En fin la troisieme bande, composée de six vingts ou plus, le cierge blanc allumé en main, & conduits par neuf qui

donc bandez de bleu & de rouge , marchoient & s'arrestoient en leurs rangs, avec autant de modestie & de jugement, que faisoient les plus religieux de la troupe.

La classe d'humanité, par les Deesses de la premiere bande tenoit de la Divinité, & de la Royauté par les Roys de la seconde. En celle-là, la Penitence affeublée d'une longue robe à queue , d'un beau satin violet, qu'un page d'honneur accoustré de mesme estoffe portoit gravement par derriere, tenoit elle mesme son guidon, lequel par ce mot sacré escrit autour d'une ancre peinte, *Penitētiā agit* , signifioit, que qui navige dans l'Océan de cette mortalité pleine d'escueils, se doit tenir à l'ancre de repentance, s'il veut surgir au port de gloire, comme avoit fait S. Ignace. Mais comme luy apres avoir lavé ses propres pechez dans les larmes , se mit en peine de sauver les autres: pour exprimer cecy, après la Penitence accompagnée de ses trois filles, & de plusieurs autres vertus, venoit la Charité & le Zele, menant en triomphe en lieu de captifs les quatre

parties de la terre, toutes chargées de chaines d'or comme autant de Zenobies.

Quant à ceux qui faisoient la bande des Roys, ils auoient sur leur diadème & vestement Royal, tant de perles & dorures, que l'esclat en fraploit les yeux de tous les regardans. Les armes de S. Ignace estoient les dons qu'ils portoient, comme l'espée, le bouchier, le corselet, le casque, les esperons, le gantelet, &c. & tout cela sur des cuissins de velours, ou de satin cramoisi, couuers de gaze d'argent. Tous les autres qui suyuoient, n'auoient autre chose en leurs mains, que le flambeau de cire blanche, & estoient conduits par quatre guidons.

La Rhetorique, qui auoit à exprimer la Gloire de Dieu pour le but de son dessein, & monstrier que cette mesme gloire auoit esté le blanc de tous les faicts de S. Ignace, s'estoit faict faire son estédart general de raffer as blanc: sur lequel la figure du saint se voyoit artistement en broderie, entourée en lettre d'or de l'Anagramme de son nom,

*Ignatius de Loyola. Soli Deo signa tult.*

Vn autre guidon après marchant deuant sa Princesse, portoit vn Iesus en Soleil, avec la deuise de la Compagnie.

*Ad maiorem Dei gloriam.*

Gloire de Dieu qui estoit majestueusement du tout, & diuinement parée, comme il estoit conuenable à celle, qui auoit l'honneur d'estre à la suite de l'Empriere du Paradis. Rien ne scauroit se trouuer en terre, qui puisse esgaler les Majestés de l'une ou de l'autre Royne, de la Gloire, ou de la Mere de Dieu: ces enfans neant-moins n'auoient rien sur eux, qui ne fust digne de leurs personnaiges. Aussi n'estoit-ce que carquans, brasselets, enseignes & dorures. Le guidon de la Pieté suyuant vestuë de satin blanc, & rayonnante de pierreries, s'appelloit Amour de Dieu, & auoit pour son escuillon vn cœur tout entouré de flammes, & transpercé d'une fiesche. Il estoit chef d'un bon nombre de ieunes hommes, representans leurs semblables, que la charité & pieté d'Ignace rédit autrefois vertueux & deuots. Chacun portoit en la main quelque meuble du cabinet de sa Royne; celuy-la le Cruci-

fix ; celuy-cy la vie des saincts ; l'autre  
vne teste de mort ; l'autre vn baudrier de  
grôs crin ; l'autre le corselet d'une haire  
l'autre vne discipline pour esperons  
l'autre l'image de son patron ; l'autre cel  
le de son bon Ange ; l'autre de quelque  
autre saint, duquel il estoit deuot.  
Vne autre bande de ieunesse, choisie  
pour ce qu'ils faisoient, habillée comme  
on peint les Deesses, suyuoit leur mai  
stresse de toutes. qu'elles appelloient *Do*  
*ctrine*. Celles-cy pareillement portoien  
à part-elles, les marques des science  
qu'elles professoient. La premiere, vn  
Caducée donnant le premier lieu à son  
eloquence ; la Dialectique vn point fer  
mé, la Mathematique vne Sphære, l'A  
strologie vn Astrolabe, la Musique vn  
Lut, la Militaire vn coutelas, & de suite  
selon qu'on nous peint les autres. Le cõ  
ducteur de cette bande, à l'estendar  
rouge & blanc, estoit somptueusemen  
& mignonnement agencé, aussi bien qu  
les quatre autres, qui diuisés entre l  
reste de leurs compagnons, les condui  
soiët de dix en dix, d'un maintien si dou  
& graue, qu'on eut jugé, s'il faut parle

ainsi, que c'estoit la douceur & la gravité  
mesme.

Les trois classes des hautes sciences,  
auoient chascune leur estendart. Celuy  
de la Logique estoit rouge, brodé tout à  
l'entour de dantele d'argent, qui reue-  
noit fort à la veüe. D'une part S. Ignace  
estoit peint, à qui sainte Catherine, la  
patrone des Philosophes Chrestiens,  
& la triomphatrice des Payens, presen-  
toit les despoüilles de ceux-cy. Et l'autre  
S. Xavier disputant avec les Bonzes;  
cõfondoit par ses raisonnables argumẽs,  
l'alogie, & l'atheïsme de ces rudes &  
grossiers idolatres, par cette conclusion  
sans replique.

*Ergo Deum victorem animis admittite victi.*

Celuy de la Physique estoit violet, sur  
le fonds duquel vn grand Soleil, luy le  
Pere de la nature, illuminoit de ses ray-  
ons d'or le nom du Soleil de grace. Ces  
mots l'appliquoient à la feste.

*Fulgebunt iusti sicut sol.*

L'un & l'autre de ces guidons estoit  
porté par deux braues ieunes hommes  
de tres-gentille façon, habillés en chef  
de guerre, à la bottine de marroquin,



l'esperon, l'espée, & hausse-col d'argent doré. Ainsi marchās au milieu des leurs, ils menoient toute la classe composée d'un grand nombre d'escoliers, tous le flambeau allumé au poing.

Suyuoit en dernier lieu la Theologie, qu'on jugea faire un des beaux corps de toute la procession. Et de fait le nombre d'iceux, qui estoit de plus de soixante, luy donnoit un tres-grand lustre, comme de gens desia hommes faits, & la plupart ou maistre es Ars, ou Prestres. Une vingtaine d'eux portoit la sotane, & le manteau long, avec le bonnet quarré en teste. Leur Capitaine Gentil'homme de bon lieu, duquel ie dois parler tantost, marchoit à la teste d'eux tous, son Lieutenant ou porte-Enseigne au milieu, avec la lance de l'estédart. C'estoit le plus grand & le plus ample de tous ceux des classes, à bandes rouges & blanches, & portoit d'une part S. Ignace en broderie, & de l'autre, l'Angelique S. Thomas. Tel fut l'ordre, le dessein, l'appareil, & la modestie de ce grand nombre d'escoliers conduits par soixante cornettes ou guidons. Après les Theo-

logiens, marchoient immédiatement les Ordres Religieux, ſçauoir, les PP. Minimes, Capucins, Recollets, Observantins, Augustins, Carmes, Dominicains, de N. Dame de la Mercé, & Feuillans. Ceux de l'Abbaye de ſaincte Croix, ordre de S. Benoist, deuançoient ſelon leur couſtume le Clergé. Tous enſemble avec autant de pieté enuers les ſaincts, que de charitable affection enuers noſtre Compagnie.

Le corps de laquelle eut ſa place entre les ſuſdicts religieux, & ceux de l'Abbaye qui precedoient immédiatement les ordres du ſuſdit Clergé. L'ordre des noſtres eſtoit tel. Vn de nos freres Philoſophe reueſtu d'un ſurpelis, portoit vne haute Croix d'argent, apres lequel venoient les Nouices, couuerts de leurs manteaux & chapeaux, ainſi que les coadjuteurs qui ſuyuoient. Les autres Preſtres, & non Preſtres, alloiét de rang deux à deux, tous avec le ſurpelis, n'ayāt autre choſe en main, que leurs flābeaux allumez, comme les autres Religieux, auſquels à la ſortie de S. André ils furent distribuez. Noſtre baniere deuan-

çant trois ou quatre pas le R. P. Prouincial, qui auoit à ses costez les deux supérieurs du College & du Nouiciat, estoit portée, & accompagnée ainsi qu'auons desia dict. Cet estendart augmentoit son lustre, quand le Soleil de temps en temps sortoit de deffoubs les nuës, & que l'esclat de ses rayons battans à l'encontre, donnoit couleur & clarté à l'or caché dans la broderie: car se muant & brillant à l'œil d'un beau changeant, s'ébloit estre comme sur-ondoyé d'un brillement tout d'or. Tout le peuple aussi, quand il passoit, faisoit deuotement la reuerence, quelques vns mesmes plians le genouil.

Après suyuoit tout le Clergé, avec Monseigneur le Cardinal, & à son costé Mr. l'Euesque de Bazas. Puis nos Seigneurs du Parlement, & après eux Messieurs les Iurats. Leurs Officiers auoient prou de peine de repousser la foule du peuple. Toutes les Paroisses, & Eglises, deuant lesquelles nous passions sonnoient leurs cloches, ne plus ne moins qu'elles font le iour de la feste Dieu. Ce que fist pareillement la maistresse cloche de la maison de ville, quand la processio

en fust proche, ayant dès le matin sonné trois fois pour en donner le signe. Voire l'on carrillonna sur celle du gros horloge, ce qui ne se faict iamais qu'à des occasions extraordinairement celebres. Les fenestres, portes, & boutiques des maisons; le long des ruës, iusqu'à six rāgs l'un sur l'autre; & sur tout les carrefours & places publiques, estoient toutes bordées & remplies de gens. Dans la Ruë seule de la Rouffelle il y auoit bien dix mille hommes, dōt quelques vns estoient venus de loing, les autres auoient quitté les champs & leurs mestiuës, seulement pour voir la solēnité de ce iour: lesquels se voyās decheus de leur attente, à cause que pour la chaleur on print le tour plus court par le marché, ils accoururent de toutes parts dans la grand ruë des fosses. Cette place dans vn instant deuint vn mōde, mais vn monde sans cahos & confusiō, tant le silēce des spectateurs estoit grand, faisans cognoistre par leur taciturnité leur admiration; & par celle-cy le respect & la deuotion interieure, que leur donnoit principalement, comme ils ont dit, la modestie religieuse de nos

Peres, & Freres.

Arriué qu'on fut à nostre Eglise, quiauoit esté iusqu'à lors tenuë expressement fermée, les Escholiers selon l'aduertissement qu'ils en auoient, s'en allerent droit à la Cour d'où ils estoient partis, pour entendre la Messe à la grande Congregatiõ, & laisser l'Eglise toute libre à tant & tant de peuple qui suyuoit. La porte d'icelle couronnée tout à l'entour de festons portoit sur son arcade les deux tableaux de S. Ignace & de S. Xavier: & vis à vis à vne autre porte ornée pareillemēt, estoit seule l'image du Roy. Du milieu du frontispice de celle-là, pendoit cette inscription, accommodée à la chaleur de la saison qui estoit alors extraordinaire.

*Maiores solito quisquis mirabitur æstus,*

*Cogitet adiungi geminos ad sidera Soles.*

Toutes les galleries, & murailles de l'Eglise depuis le haut du lambris, estoient ou reuestues de belles tapisseries, ou ornées de peintures. Les autels magnifiquement garnis, & principalement le grand, que plus de deux mille fleurs en cette cuison de la canicule, disposées en vne centaine de vases, & plusieurs ima-

ges de nos saints, & entre autres trois grands tableaux faicts exprés pour cela, escartelez de barres d'or, rendoient venerablemēt Auguste. Tout le bas estoit remply de sieges pour la place de tous les Ordres, les bācs de nos Seigneurs de la Cour estans distinguez des autres par les tapisseries de la grand Chambre, qui furent apportées de leur part à cet effect.

Sur le point, que les Religieux entrerent, les haut-bois & cornets à bouquin commencerent melodieusement à sonner, les orgues leur respondant, iusques à ce que, les nostres s'estant retirez par la porte du grand Autel, pour donner toute la place aux autres, Monseigneur le Cardinal, à qui l'on auoit dressé vn daix de damas rouge, estendu sur son theatre, fust prest à commencer la grand Messe, apres laquelle il exposa luy mesme le S. Sacrement. Toute l'Eglise resonnoit de voix, de Cantiques, & de motets.

Quant au reste de la matinée, on fut contrainct de céder à la chaleur, causée principalement par la foule innombrable du peuple, & reseruer la predication pour les Vespres, lesquelles ayant esté

dignement chantées par la Musique de mondict Seigneur, qui nous comblant de faueur auoit voulu prendre son dîner au College; avec Monsieur de Bazas, Monsieur le Marquis d'Alluys, & Monsieur le Comte de Ioigny fils de Monsieur le General des Galeres, ledict Seigneur de Bazas, en presence de Monseigneur l'Illustrissime, Monsieur le premier Presidēt, & de plusieurs autres auditeurs de marque, honora le premier nostre chaire, donnant l'ouuerture aux sermons, qui s'y firent les iours d'après: Son theme fut prins de S. Pol.

*Sancti per fidem vicerunt regna, operati sunt iustitiam, adepti sunt repromissiones.*

Sur lequel quelles loüanges oubliâ-ils? Quels eloges ne dict-il, pour les eloges & loüanges de nos bien heureux? reuenans tous à la gloire de Dieu qui est adoré en ses saints, & les saints sont honorez en luy: les appellans triomphateurs des Villes, des Prouinces, des nations, des Royaumes, de l'vniuers, & surtout de l'enuie & malignité des meschans, prouuant & par son propre tesmoignage, & par l'experience commune, qu'un des

grands trophées de S. Ignace, auoit esté celuy qu'il auoit dressé des despoüilles de la calomnie, qui enuent tousiours aux seruiteurs de Dieu. Ce qu'il dict avec vne grande eloquence, autorité, & ferueur d'esprit.

Il ne restoit plus au Soleil de ce iour, que de ceder au feu de ioye, qui se fist après son coucher, sur les neuf heures du soir. Ce fut en la grand' & large Ruë des fossez, deuant la grãd'porte du College, où Messieurs les Iurats auoient fait dresser le bucher, continuans en nostre endroit les tesmoignages de leur accoustumée bien-veillance. Le Seigneur Marquis d'Alluys frere de Monseigneur l'Archeuesque Cardinal, vint au College de propos deliberé, sur la tres-humble requeste, que nous luy en auions fait, pour faire la cerimonie, & allumer le feu. Les Escoliers avec tous leurs guirtons ayans esté diuisez en deux bandes, l'une d'infanterie, l'autre de Caualerie, chascune cõduite par leurs chefs, Lieutenans, & Sergens de bande, firent en si bel ordre, & si agreable desmarche, la reueüe à l'entour d'iceluy, que l'on ne desira



Gra point les Compagnies de la ville, que Messieurs lesdicts Jurats nous eussent tres-volontiers données. Et à l'heure mesme que les troupes se retiroient à leur quartier, ledict Seigneur Marquis accompagné du R. P. Prouvincial, & de plusieurs de nos Peres, vn d'iceux portât deuant luy, la torche blâche allumee en main, apres auoir faict quelque tours selon la coustume ordinaire, la cloche de la maison de ville & les cornets à bouquin sonnans, print le flambeau que luy presenta ledict Pere, & mit le feu aux quatre coings de la pyre. Tout aussi tost les canons, roulez dessus les fossez dès les trois heures du matin, commencerēt à tirer: l'artillerie du Chasteau, Trompette leur respondant sur le port, & grande quantité de fusées qui bruyoient & sortoient de toutes pars de la tour de la maison. Cependant tout aupres du feu la Musique chantoit le *Te Deum*, mais il ne fust pas si bien entendu comme les hautes acclamations qu'on faisoit pour le bon-heur, & prosperité du Roy: tant l'alegresse des escholiers estoit nompareille, la multitude du peuple non croyable,

& si bien affectionnée à cette feste, que parmy VIVE LE ROY, on crioit encore, VIVE S. IGNACE. Le iour si ioyeusement & heureusement paracheué, Monsieur le Marquis fust reconduit à sa maison au son des mesmes haut-bois, & chascun se retira loüant, & benissant Dieu en ses saincts.

Le lundy iour de S. Iacques, la Messe commune ayant esté celebrée par Monseigneur de Bazas, & la suyante par Monsieur l'Abbé de Cleyrac, Chanoine de S. Iean de Latran, & la grande chantée en Musique par Monsieur Miard Vicaire General, où il y eut grand nombre de communians, le R.P. Villate predicateur de la grande Obseruance, de qui le nom est assez cogneu en ces quartiers, pour la reduction que la grace de Dieu opera n'aguères par son entremise à l'Eglise Catholique de toute la ville de Foix, prescha sur les neuf heures à vne tres-belle assemblée de la loüange de nos saincts: ayant choisi fort à propos ces paroles de la Genese. *Fecit Deus duo luminaria magna, &c.* sur lesquelles d'une grande eloquence conioincte à son affection,

il fit les paralleles de S. Ignace au Soleil, pour auoir ou esclairé, ou rechauffé les Chrestiens, qui estoient au iour de la foy, & ne suyuoient pas sa lumiere; & de S. Xavier à la Lune, pour auoir illuminé les Indois, enuelopez dans la nuit de l'erreur, & obscurité du paganisme. Le reste qu'il dict à l'aduantage de nostre Cōpagnie, comme qu'elle estoit la mere des Religions, la Conseillere des Roys, la protectrice de la Couronne, l'appuy & le soustien de l'Eglise, & la quintessence de tous les ordres, fut vn excès de sa charité enuers nous. Apres ce sermon, Messieurs les Iurats en corps nous obligerēt d'abondant de prendre leur repas en nostre Refectoire.

Le mesme iour, apres Vespres chantées solennellement en Musique, le R. P. Bonauenture du Religieux Ordre des Capucins fist aussi vne excellente predication, de laquelle par l'artifice d'un vray orateur, il ne voulut prendre d'autre theme, que la question deuotement curieuse, pourquoy ces deux si grands saints n'auoient esté plustost canonisez, veu les marques de sainteté qui toutes relui-

soient en eux, & euaussi leurs grands travaux durant leur vie ; leur plus grands miracles apres leur mort ; & les tres-grands fruiçts , que tous les iours l'arbre qu'ils auoient planté , produisoit par tout le monde. A quoy il respōdit en fin, & le repeta par deux fois, que S. Ignace & S. Xauier n'auoient pas voulu estre recogneus triōpher au ciel, qu'ils n'eussent triomphé de l'heresie en terre, ainsi qu'ils auoient desia faict , & continuoiet plus que iamais par les benediçtiōs iournalieres, que leurs prieres & intercessiōs faictes deuant Dieu versent sur les armes du Roy. Pour l'accōplissement de quoy, & prosperité continuelle de sa Majesté outre l'oraison qui se faisoit , on commença ce soir la , ce qui continua toute la sepmaine à mesme heure , de chanter à nostre Eglise quelque motets de deuotion , auēc l'Exaudiat en Musique : suiuy des Litanies tant des Saints, que de la Royne des Saints, qu'un de nos Peres des plus anciens, reuestu du surpelis audeuant du grand Autel, recitoit à haute voix.

Ainsi la deuotion du matin se joignoit

à celle du soir, & celle-cy au iour suiuant. Car le Mardy feste de S. Anne, ceux qui les iours auparauant n'auoient peu pour la multitude des autres, satis-faire à leur deuotion, l'accomplirent en grand nombre. Puis la Messe de Monsieur l'Abbé de Cleyrac acheuée, le R. P. Nodinot, docte & deuot Religieux des Minimes montant en chaire, print pour subiet de son sermon *Fidelis Deus qui vocauit vos in societatem Iesu*. On recogneut facilement à son discours & feruente action, que le nombre choisi des choses remarquables qu'il disoit à la gloire des saincts, luy auoit esté suggeré par l'amour qu'il leur portoit, disant qu'ils estoient les predestinez du grand Dieu pour deffendre s<sup>on</sup> Eglise, pour extirper les heresies, & pour faire triompher la foy. Je ne doibs obmettre l'attention, & silence extraordinaire, avec laquelle & ce sermon, & tous les autres furent escoutez : le peuple restant fort edifié de voir la charité & deuotion de ces doctes & religieux personnages, employans leur eloquence, & doctrine si abondamment & affectueusement, pour joindre le ressentiment de

l'Eglise militante, avec celui de la trióphante.

L'apresdinée sur les trois heures, le maistre de la Rhetorique prononça le Panegyrique des Saints en la Chappelle de la grande Congregation. La chaire, les bancs, les murailles estoient augustement tapissées, & tout autour près du lambris voltigeoient diuerses banderoles, & liurées des escholiers. C'estoient comme autant de tableaux racourcis, de ce que l'eloquence de l'Orateur alloit amplement expliquant. Les tribunes de ladiète chappelle, estoient pleines de religieux : l'assemblée de tous les corps de la ville fort grande, la bien-veillance, & attention des auditeurs admirable, & la chaleur extreme du temps ne peut point empescher l'affection, ny surmonter la patience d'un grand nombre des principaux de ce tres-auguste Parlemēt. Messieurs les Iurats avec la marque de leur dignité, & Messieurs de l'Vniuersité y voulurent assister en corps. Les belles loüanges que tous donnerent à cette action furent tesmoignages du contentement qu'ils y auoient reçu.

Mais il faut clorre ce iour , qui fust la closture de l'oraison des 40. heures, par le sermon tres-disert du R. P. Hilaire de l'ordre des Recollects , lequel ayant prins pour theme les paroles de l'Ecclesiastique. *Simon Onia filius Sacerdos magnus, qui in diebus suis corroborauit templum* , & se voyant, disoit-il, non moins oppressé par la grandeur de l'argument , que pressé par la briefueté du temps, s'arresta principalement à S. Ignace : duquel ayant faict tresdoctement quelques principaux paralleles , avec le temple de Salomon, comme il fut sur l'application du Propitiatoire , dict avec vne grande ferueur, qu'il falloit que tous les Ordres de l'Eglise confessassent, qu'ils auoient peu apprendre du liure des Exercices de saint Ignace, à se rendre Dieu propice: & qu'il estoit le parfaict modele de toute la deuotion Chrestienne , tant seculiere, que reguliere. Tout le reste de ce beau sermon prononcé avec ressentiment pareil, fut ouy fort attentiuement par vne grande multitude de peuple : apres lequel soudain par vndoux cōcert de voix la Musique donna signe, qu'on vouloit

faire la closture. Cependant Monsieur de Cleyrac reuestu d'un tres-riche plural fut conduit deuant l'Autel, fix des nostres marchans deuant luy, reuestus de surpelys : & tous les autres en grand nombre, chascun son flambeau en main, remplissans tout le balustre. Lacerimonie acheuée, la benediction avec le S. Sacrement donnée, & ledict Sieur Abbé s'estant retiré, vn des Peres qui l'auoient conduit, estant demeuré à l'Autel, recita les Litanies, avec vn singulier respect & deuotion de tout le peuple, qui à peine pouuoit sortir de l'Eglise, quoy qu'il fust desia bien tard.

Ces trois iours ainsi bien employés & consacrez à la pieté, les trois suyans furent donnez aux exercices de doctrine & literature. Car dès le Mercredy matin, on commença de tapisser la grande Cour des Classes, pour y desployer les ornemens des sciences qui s'y enseignent, & en rendre encore aux deux SS. la deuë recognoissance. C'est vne des belles places qui se puisse voir pour vn College, tellement que tant à raison de son espace, que de la multitude des affi-



ches, on employa tout le iour à la parer. Sur les trois heures apres midy fut dressée la Pyramide au milieu des trois grâds ormeaux. Ell'auoit vingt-& huit pieds de hauteur. Ses quatre faces en champ d'azur , portoient chascune leurs inscriptions. Le reste d'icelle, avec le pié-de-stal estoit tout garny d'Emblemes, Peintures, Hieroglyphes, & diuers Chifres. Les noms des deux saincts ensemble, par vn I au mitan de l'X. representans aucunement le Labarum de Constantin, estoiet sous vne mesme couronne avec la deuise en or.

AMBOS FECIT SORS VNA BEATOS.

Pour laquelle conjunction, & ressemblance, qui auoit esté tousiours entr'eux, soit en cet inuincible courage à supporter, & surmôter de si grâds traualx pour l'amour de Dieu, & aduâcemēt de sa gloire; soit au desir insatiable du salut de leurs prochains, l'Vniuers leur congratuloit en cette sorte de leur canonization presente.

IGNATIO DE LOYOLA  
ET FRANCISCO XAVERIO.

GEMINIS

VTRIVSQVE

ORBIS HEROI-

BVS, GERMANIS

SACRO-SANCTI NO-

MINIS IESV GLORIFI-

CATORIBVS, EXIMIIS CHRI-

STIANI IMPERII PROPAGA-

TORIBVS, INDEFESSIS FIDEI

PROPUGNATORIBVS, INVICTIS ERRO-

RVM DEBELLATORIBVS, INFRACTIS HÆ-

RETICORVM MALLEIS, DIVINIS CHARI-

TATIS INCENDIIS, STUPENDIS SAN-

CTITATIS MIRACVLIS, TERRA, MARI,

COELOQVE, SVPREMI NVMINIS OPE,

TRIUMPHATORIBVS PERPETVIS, A

DEO OPT. AETERNITATEM DA-

TAM, A PONTIF. MAX. DIGNI-

TATEM ADDITAM, AB REGE

IVSTO GLORIAM IMPETRA-

TAM, AB ECCLESIA CVLTVM

AC MEMORIAM CONSE-

CRATAM CHRISTIA-

NA, ET CATHOLICA

VNIVERRSITAS GRATVLATVR.

Les ormeaux, qui par leurs branches couronnoient la pointe de la Pyramide, auoient leurs troncs aussi tapissiez. Deux desquels estoient entourez de toutes sortes de compositions, Latines, Grecques, Hebraïques, Syriaques, & Arabiques: & le troisieme portoit huit Emblemes, tirés des qualitez du feu appliquées ingenieusement aux vertus de S. Ignace. Le titre du premier estoit, la premiere propriété de ce noble Elemēt, *LVCET. L'EMBLEME.* La colonne de feu conduisant les Israélites, durāt l'obscurité de la nuit. *LA DEVISE.* *Sacerdos magnus quasi ignis effulgens. Eccl. 50.* La significatiō. Que S. Ignace par l'exēple esclatant de ses vertus, auoit guidé & adressé plusieurs ames au chemin de leur patrie celeste.

Le tiltre du second. *CALEFACIT. L'EMBLEME.* Vn Geant porté sur vn char d'Helie, tiré par deux grands courriers, iertās le feu par les narines. Au desous le globe terrestre. *LA DEVISE.* *Non est qui se abscondat à calore eius. Psal. 18.* La signification. Que ledict Sainct ayant par le moyen de ses enfans parcouru &

tournoyé tout l'vniuers, auoit rechauffé de l'amour de Dieu le cœur des peuples les plus barbares, & glacez du froid de l'infidelité.

Le tiltre du troisieme. *V R I T.* L' E M B L E M E. Vn tas de charbons esteints, & vne pluye de feu tombât du ciel pour les rauier. LA D E V I S E. *Carbones succensi sunt ab eo. Psal. 17.* La signification. Que ce zelé personnage auoit r'alumé la pieté des Catholiques, ou presque esteinte, ou fort amortie de son temps.

Le tiltre du quatriesme. *P V R G A T.* L' E M B L E M E. Vn champ defriché par le feu. LA D E V I S E. *Quasi ignis qui comburit fyluam, Ps. 32.* La signific. Que cet ouurier Euangelique auoit purgé le sol de l'Eglise, des ronces & halliers des heresies, qui auoient pullulé de toutes parts.

Le titre du cinquiesme. *A B S V M I T.* L' E M B L E M E. Deux Prestres Iuifs entretenans de bois le feu sacré, qui deuoit continuellement brusler sur l'Autel. LA D E V I S E. *Ignis nunquam dicit, sufficit. Prou. 30.* La signification. Que le cœur de ce saint homme auoit esté embrasé d'un ardent zele de la gloire de Dieu, &

du salut de son prochain.

Le tiltre du sixiesme. *SOLVIT*. L'EMBLEME. Vn vase plein de cire fondant sur le feu. LA DEVISE. *Sicut fluit cera à facie ignis. Psal. 67.* La signification. Que cet invincible courage avoit dissipé tous les conseils & entreprinſes des meſchâs dressez contre sa famille.

Le tiltre du septiesme. *PROPAGATUR*. L'EMBLEME. Vn homme tirant du feu d'une pierre, lequel tombant sur vne matiere disposée, excitoit vn grand incendie. LA DEVISE. *Ecce quantus ignis quæ magnum incendium excitat? Iacob. 3.* La signification. Que la Compagnie de IESVS tres-petite en son origine, avoit esté par ce S. Patriarche multipliée, & estendue par toute la terre.

Le tiltre du huitiesme. *SURSVM TITVR*. L'EMBLEME. Vn venerable personnage, leuant les yeux & bras en haut, du sein duquel sortoit des flammes. LA DEVISE. *Factus est in corde meo quasi ignis æstuans, claususque in ossibus meis. Iere. 20.* La signification. Que cette sainte âme en toutes ses actions n'avoit tēdu & aspiré que vers le ciel son vniueſel cētre.

Iettons les yeux sur le reste. Les Regens d'humanité auoiēt diuisé entr'eux toute la Cour en six pars. Celle de la Rhetorique estoit ornée de vingt-cinq tableaux faicts à l'huyle la pluspart, & embellis de leurs corniches. Sur le tout regnoit ce grand Anatheme enuironné de guidons.

*QVOD euolutis retro pluribus annis SOCIETAS IESV continentibus votis ab immortalī Deo, cœlestibusque omnibus precabatur; QVOD nostra finitime, atque seductæ gentes, quibus effusam erroris caliginem effuso veritatis splendore deterisit, efflictim unâ deperibant; QVOD illustrissimus Purpuratorum Patrum Ordo ad numeros sæpe iniectum, & ad solemnem Rotam exquisitè versatum in dies promouebat; QVOD Augustissimæ Reges, & Primores orbis terrarum: ac non pridem Christianissimus Galliarum REX LVDOVICVS DECIMVS TERTIVS quàm qui maxime prosequabatur, ut Beatissimus SOCIETATIS IESV author, & Patriarcha IGNATIVS; iuxta præcellentissimus Indorum nuncupatus Apostolus, XAVERIVS, qui cœlestium alio certissimè descripti essent, Sanctorum nomine iam passim augerentur: Ist tandem annus, qui ab instaurata mundi salute supra millesimum sexcentesium vigesimus secun-*

*du, à sanctissima GREGORII DECIMI QVINTI Sede secundus, votis quippe omnibus obsecundans, Diuina numinis virgula, beata cæli conuersione, fauente Romana rota vertitur, ita decernente Christi Vicaria voce, Veritatis interprete, internuncia Diuinitatis, plaudente bonorum omnium letitia, fremente, & ringente malorum inuidia gloriosissimè celebrauit.*

L'humanité n'en auoit que quinze, de sept à huit escus la piece, mais le prix, la grandeur, la peinture, & l'argument d'un seul, rauissoient les yeux de tous les regardans. Sa Majesté tres-inuincible au milieu de ses bataillons, montée sur un cheual de guerre, bardé & armé à la Royale, le faisoit cabrer des deux pieds sur un Hydre. Ce monstre à sept gorges beantes, sifflait, & soufflait son venin, & par les plis & replis de son corps monstroît la crainte qu'il auoit du Glaive qui foudroyoit sur luy. Le Roy cependant entoisait le bras, & frappait à grands coups dessus, auoit desia abbatu cinq testes : & la gorge à demy coupée, ou la teste estourdie des autres, monstroît qu'il auroit bien tost fait : veu les prieres que nos deux Saints, qui regardoient du ciel ses

combats, presentoient à la diuinité pour ses glorieuses victoires. Le subiect de ce tableau fut le renco ntre d'vn tres-heureux Anagramme, qui dans les noms des bienheureux canonizés, expliquoit ainsi tout ce que dessus.

*Ignatius de Loiola et Franciscus Xavier*

*Lodoici Regna Seruatis Ex Caluini Fastu.*

La troisieme en auoit trente deux. La quatriesmetreze. La cinquiesme dixsept & la sixiesme vingt & vn, au bas desquels estoient les compositions pour estre plus facilement leuës. On eust dit que c'estoit ou le Panathenée de Minerue , ou le Parnasse d'Apolló, ou l'Helicon des Muses qui auroient entrepris durant trois iours de faire voir dans le secret de leur plus sacrez cabinets par vne infinité d'Emblemes, Peintures, Hieroglyphes, Tableaux, Oraisons, Poësies, Epigrâmes, Inscriptions , les richesses excellentes de leurs ingenieux thresors. Ioint que tous les estendarts , voltigeans agreablement au vent, suspédus en raisonnable distance l'vn de l'autre le long de la susdicte Cour, delectoit les regardās, & dōnoit lustre à tout ce qui estoit estalé.



lé. Or à cause que ce soir là, le Ciel sem-  
bloit menacer de tonnerre , on retira  
quelques tableaux de crainte qu'ils ne  
se gastaient à la pluye: mais ce fut vn tō-  
nerre de bon-heur , tres-fauorable pour  
tous les iours suyans. Car n'ayant gron-  
dé qu'un seul coup, il tempera tellement  
l'air enflammé par le hale du tēps , qu'il  
en demeura tout plaissant, & laissa toute  
son ardeur à la feruente dispute, qui se fit  
le lendemain sur les secrets des Enig-  
mes. Plusieurs doctes Aduocats en signa-  
lerent diuers, par leurs attaques honora-  
bles, & pleines d'erudition : & fallut à la  
requeste de quelques Presidens, & Con-  
seillers de la Cour , qu'on commençast  
dés ce iour mesme, l'explication d'iceux,  
qui auoit esté reseruée pour le Vendre-  
dy seulement. Chasque classe à cet effet  
auoit fait garnir sa chaire, où c'estoit vn  
plaisir de voir les enfans des premiers  
& plus apparens de la ville, les vns  
habiliez en robe longue, les autres  
en Capitaines, d'une allegresse, hardies-  
se, & gētilese du tout aimable, designer  
auec leurs gaules peintes, aux yeux de  
toute sorte de spectateurs, ce qu'ils de-

duisoient par paroles. En voicy quelques eschantillons.

## ENIGME.

Vn Lyon blessé à vn pied, comme jadis celuy d'Androdus, défarrouchant vn peu son œil, & abaissant doucement sa teste, monstroit son mal à vn Pasteur, semblant luy demander remede. Cettuy-cy en pensant sa playe luy faisoit cette remonstrance.

### ΧΑΡΙΝ ΜΕΜΝΗΣΟ.

Laquelle entra si auât dás le cœur généreux de ce Roy des animaux, que s'estât retiré en sa grotte, il en fit vn tēple nouveau, dans lequel trois chastes Vierges deuoient chanter iour & nuict les graces du bien-faict reçu. Celle qui pour sa dignité tenoit le milieu dans la peinture, auoit vne Grenade en main. La secōde modestement voilée portoit vne brāche de palme, & fouloit au pied vn dragon. Sur le poing de la troisiēme estoit le fameux oyseau, qu'Aelian nomme Porphyryon, grand amy de Virginité.

### EXPLICATION.

Le Lyon blessé au pied, S. Ignace. Le Pasteur, S. Pierre. La grotte, la cauern

de Manreze. Le Temple, la Compagnie. Les Vierges, les trois vertus signalées d'icelle. La premiere, la Charité tres-estroicte entre des nations si diuerfes. La seconde, l'Humilité si profonde avec vne telle doctrine. La troisieme, la Chasteté Angelique parmy tant de Jeunesse.

Celuy-cy touchoit S. Ignace, le suyuant est de S. Xavier.

### ENIGME.

Vn Geant de la mesme stature, que les Poëtes ont décrit Atlas, estoit dans la mer iusqu'à my-cuisse, portant sur son espaule large & voutée, la figure d'un Globe celeste. LA DEVISE. *Axem alium torquet.* De la main gauche, il peschoit des perles Orientales: de la droite, il les enchassoit dans son globe.

### EXPLICATION.

Le Geant S. François Xavier. La Mer, ses grands travaux. Les perles, les ames par luy baptisées. Le Globe celeste, le nouveau monde des Indois conuertis.

Ce 3. est des deux Saints ensemble.

### ENIGME.

Vne troupe d'Ange tous empressez à bastir vne citadele. Sur chasque pierre

taillée en forme de bouclier, estoit en-  
 graué le nom tres-auguste de IESVS. Vn  
 homme vn peu plus grand qu'eux, reue-  
 stu de la même sorte que celuy qui s'ap-  
 parut à S. Jean, la ceinture d'or sur les  
 mammelles, tenoit vne regle en main, es-  
 critte de ces quatre lettres, A. M. D. G.  
 & les regardoit trauailler. Cette tour  
 auoit quatre portes, tournées aux quatre  
 coings du monde. Deuant celle qui re-  
 gardoit l'Orient, vne grande multitude  
 de peuple, séparée de toute la mer, estoit  
 prosternée en terre, comme luy deman-  
 dant secours. Iusqu'à ce que ce monde  
 nouueau s'apperçoit d'un vase d'or, sus-  
 pendu au milieu des nuës, si plein qu'il  
 regorgeoit sur eux, & trempoit toute  
 leur teste. Sur le vase estoit escrite la  
 deuise de S. Xavier. *Satis est Domine, Satis est.*  
 La generale inscription expliquoit aisé-  
 ment le tout. *Turris forti ssima nomē Domini.*  
*Mille clipei pendent ex ea.*

Ce quatriesme declaroit les fruicts de  
 leur compagnie, & l'estenduë d'icelle.

### ENIGME.

Vne venerable Matrone, ressentant sa  
 diuinité, tenoit en sa main l'Arc en Ciel,

avec ce mot de l'Eſcriture ſaincte. *Vide arcum & benedic illum qui fecit illum.* Cet Arc de l'un de ſes bouts, qui eſtoit vers le le midy, touchoit vn grand braſier allumé, donnant iour à certe Eſcriture. *In meridiano exurit terram.* De l'autre vers le Septentrion, vn foudre bruyant faiſoit retentir ces paroles. *Vox tonitruum eius, tempeſtas Aquilonis.* La corde de l'Arc eſtoit toute tiffuë d'eſtoiles. **LA DEVISE.** *Species cæli gloria ſtellarum.* La fleſche armée d'un fer ardent, & empennée d'une teſte de Cherubin portoit. *Peſuite ſicut ſagittam electam.* Le but où elle viſoit c'eſtoit vn nom de IEſvs. *Oriens eſt nomen eius.* La deuiſe generale. *Attingit ergo a fine uſque ad finem fortiter.*

### EXPLICATION.

La Matrone, la S. Eglise noſtre mere. Sa main, l'Occidēt, ou eſt ſon ſiege. L'Arc en-ciel, la Compagnie. Le braſier, ſon zele allumé au dela meſme de la zone torride. Le tōnerre, ſa doctrine Euāgelique foudroyant les heresies campées au Septentrion. La corde, S. Ignace. Les eſtoiles, ſes enfans. La fleſche, S. Xavier. L'Orient, la gloire de IEſvs.

Plusieurs autres belles pieces pourroient aussi justement que celles-cy demander icy leur place. Ma briefuete en aura le tort : & quelque autre plus à propos pourra reparer ma faute. Je passe à la munificence, & liberalité, de laquelle il pleust à cette Cour souveraine si magnifique enuers nos deux Saints, récompenser de surcroist & signaler les labeurs de leur tres-florissante ieunesse, qui avec tât de deuoir, d'esprit & de pieté, s'estoit employée à les honorer. Ce fut à la fin d'une belle & deuote actiõ sur la cõuerstiõ de S. Ignace, le Samedy veille de sa feste que furent distribuez les prix. L'argument de la Tragicomædie estoit compris en ces vers.

ACTVS I.

*Saucius effertur Loyola. Ecclesia luget.*

ACTVS II.

*Curatur. Legit. Et sanctos exardet in ignes.*

ACTVS III.

*Garcia seuit. Amat. Luther Stygis euocat artes.*

ACTVS IIII.

*Miles abit. Virgo tulit ensẽ. Pauper amictus.*

ACTVS V.

*Virtutes, Genij pugnant. Victa Hæresis ardet.*

Ce ne fut qu'une leçon de sainteté, tout ce que S. Ignace fit: rien qu'une déplorable Comœdie, ce que bouffonnoit Luther. Les paroles, les gestes, la repentance du conuerty, enflammoit les cœurs à l'amour de Dieu & au mépris du monde. Le ventre, les plaisanteries, & la rage de l'Apostat, remplissoit les spectateurs d'une part du mépris de l'herésie; mere de vices si abominables, & de l'autre d'une juste indignation. On ne voyoit que des Anges, des Vertus, S. Pierre, Nostre Dame, inspiras & encourageas le Saint. Et avec ce mal'heureux rien que monstres, furies, & diables. Aussi furent-ils bien tost mis en desroute, & l'herésie garrotée, attendant l'année bien-heureuse, que le tres-victorieux, LOVYS XIII. par ses armes de Justice estouffant la rebellion, digne engeance d'une telle vipere, la devoit du tout estindre: & obliger S. Ignace & S. François Xavier, en les prenant pour ses patrons, & en aduançant leur gloire enterre, à obtenir du grand Roy du ciel par leurs prieres continuelles, les faueurs & benedictiōs nécessaires à ses entreprises.

Nous voicy au Dimanche dernier iour du mois de Iuillet, iour dernier de la solennité, dernier de la huitaine, dernier de la vie mortelle de S. Ignace jadis, & le premier de l'immortelle, de laquelle il jouit maintenant. Pour la plus grande célébrité duquel, furent derechef assemblez les Escholiers au matin pour faire encore vne fois la Procession par la ville. Celle-cy composée d'eux seulemēt satisfist au desir de ceux qui n'auoient peu voir la premiere, & alla en mesme ordre & disposition que dessus, par toutes les rues destinées aux processions solennelles. Il ne faut point redire icy, mais repenser seulement ce qui a esté dict en l'autre du concours, affluance, admiration, silence, & deuotion de tout le peuple: regardant qui la modestie, qui le bel ordre, qui le riche equippage de ces bandes, cornetes, habillemens, deuises & guidons. Monseigneur le Cardinal mesme, les voulut voir de son palais Archiepiscopal comme ils sortoient de son Eglise Cathedrale. La baniere qui suyuoit immédiatement la Musique, estoit portée & accompagnée de huit ou dix des nostres seulement. La foule, qui as-



ſiegeoit toute la ruë deuant la porte de  
noſtre Eglife, donnabien de la peine aux  
ſoldats du guet qui la gardoient : en la-  
quelle la proceſſion eſtant entrée , la  
grand'Meſſe fut chantée en Muſique à  
deux chœurs, par Meſſieurs du Chapitre  
de S. Surin, qui nous ayant quaſi tous les  
iours de la huiſtaine obligez de leur bel-  
le harmonie, le firent encore plus ce der-  
nier iour, auquel durant la proceſſion ils  
chanterent par trois fois les Litanies des  
Saints; & l'apreſdinée les Veſpres. Apres  
leſquelles preſcha le R. P. Prouincial ſur  
ces paroles d'Eſther, qui auoient ſeruy,  
comme nous auons dit, dedeuſe au pre-  
mier guidon de la proceſſion generale.  
*Sic honorabitur quem Rex voluerit honorare.* mō-  
ſtrāt quel'hōneur qu'on rend aux ſaincts,  
abboutiſt au ſainct des ſaincts , auquel  
ſeul appartient l'honneur abſolu, & tout  
autre luy eſtant relatif. Aucuns de Meſ-  
ſieurs les Preſidēs, Cōſeillers & Officiers  
de la Cour, nous auoiēt fait l'hōneur de  
diſner avec nous, cōme fit auſſi Monſieur  
le General des Galeres, lequel s'eſtant  
communié le matin à noſtre Eglife, vou-  
lut encore aſſiſter au ſermon, avec plu-

sieurs autres Seigneurs, & Dames, outre l'affluence du peuple qui remplissoit nostre Eglise.

Mais voila dessus les fossez les voix d'allegresse d'un monde, qui appellent la ville derechef à un autre feu de ioye, attirée par l'appareil, qui s'en faisoit. Non seulement le long, & le large de cette grande rue, mais encore le toit des maisons estoit tout chargé de gens. On auoit esleué pour les feux artificiels sur la grand'porte du College, un Theatre, qui la couuroit toute. Aux quatre coings d'iceluy se voyoient quatre figures debout, dōnans chacune du pied à un Globe, & au milieu d'elles une Pyramide finissât à une Croix, entre les bras de laquelle, qui se terminoient à trois fleurs de lys, estoit graué un Iesus. Ce dessein fut expliqué pardiuers diuersement. Un entre autres l'interpreta de cette sorte, disant, que c'estoit pour représenter le feu, qui apporté au monde par Iesus-Christ crucifié, auoit esté mis par S. Ignace, & S. Xavier aux quatre parties de l'univers. Mais le vray sens estoit tel. La principale de ces figures & la plus

horrible de toutes, tenant en sa gauche vn liure ensoufré, & en la droicte vn gros serpent, representoit l'Herésie; les autres trois estoient les Furies: sçauoir est, la Megere de Cruauté, la Typhonie d'Ignorance, & l'Alecto de Rebelliō. Toutes escumoient de rage, grinçoient des dents, herissoiēt leur poil tressé & retors de longues couleures & brandissantes chascune leur torche vouloiēt cōsumer le globe, que par superbe elles fouloient. Ce qu'afin de pouuoir plus facilement executer, elles demanderent secours au dragon d'enfer, qui gros de rage & de salpestre, jettant feux & flammes par les yeux, sortit du ventre bluatre, d'vne nuë toute poisseuse. Mais au lieu de mettre le feu aux globes, il enflamma ces furies, lesquelles jettans de hauts & espouventables cris, furent incontinent aux abbois, iusqu'à ce que creuans par le milieu on les veist poudroyées en cendres. Ainsi la vertu & gloire des deux Saints signifiée par la Pyramide, demeura victorieuse par la faueur des fleurs de lys, de la Croix, & du nom de IESVS. La Pyramide vainquit l'herésie; le doux nom

du Sauueur, la Cruauté; la science de la Croix, l'ignorance; & les lys, la Rebellion soudain en signe de triomphe, la Pyramide se mit en feu, duquel s'allumerent les Globes. Toutes les parties de l'vniuers exprimées par iceux, voulans participer à la ioye, & congratuler à la gloire de ceux, dont elles auoient receu tant de biens.

Le bucher estoit aussi tout prest, couronné de branches de lauriers, & parsemé de fusées; en la mesme place, que celuy du Dimanche precedent, lequel fut bien semblable à celuy-cy, quant aux ceremonies qui y furent obseruées, mais surpassé de beaucoup par la multitude des Escholiers. Et c'est en cet endroit où parust l'affection de ce Gentilhomme, le chef de la bande des Theologiens, qui ayant entrepris de garentir le feu de la presse, auoit assemblé ce iour là vne compagnie de picquiers, & mousquetaires: lesquels rangez de part & d'autre, M<sup>rsieur</sup> le Comte de Loigny conduit par le R. P. Prouincial au son des cornets à bouquin, vn de ses pages

portant deuant eux le flambeau allumé, fit les tours accoustumez & mit le feu au bucher. Lors tirerent derechef les canōs de la maison de ville, avec des acclamations sans nombre pour les triumphes & victoires du Roy. Il faisoit beau voir sur tout cet artillerie de oometes poudreux, & armée de fusées bruyantes. Il sembloit qu'ellés vouloient aller s'attacher aux cieux, comme nouuelles estoiles. Au moins inuitoient-elles les spectateurs, à dresser leurs yeux en haut, & porter leurs cœurs au Paradis, où joiüssent de la gloire essentielle de leur maistre, & souverain Seigneur ceux ; qui en receuoient alors tant d'accidentelle en terre. Le feu luy soit de toutes parts, & les cris de ioye resonnoient encore, quand l'infanterie des Escoliers suyuant en bel ordre son Capitaine, apres que la Caualerie, qui estoit grosse, se fut retirée, fit noblement sa reueuë les tãbours battans tout autour de la Cour des classes, & puis se rejoignãs en ordōnãce allerent tous ensemble par la ville accōpagner ledit Sieur Cōte iusqu'à sa maisō, qui estoit au Chartreux sur le port. Et ainsi finit cette iournée, l'abre-

gé de toutes les précédentes, soit en bonheur, & faueur du ciel; soit en grace & bien-veillance de la terre. Aussi les derniers iours, au dire mesme de Pindare, sont les plus sages, & plus fideles temoings d'une felicité asseurée.



*Nimis honorificati sunt amici tui*  
*Deus. Psal. 138.*



A. M. D. G.



# ANAGRAMME.

IGNACE DE LOYOLA

ET

FRANÇOIS XAVIER.

Io, Io,

Ceux-ci gardent la France  
A LOYS.



THE UNIVERSITY OF CHICAGO

LIBRARY

540 EAST 58TH STREET

CHICAGO, ILL. 60637

TEL. 773-936-5000

FAX 773-936-5000

WWW.CHICAGO.EDU

WWW.CHICAGO.EDU

WWW.CHICAGO.EDU

WWW.CHICAGO.EDU

WWW.CHICAGO.EDU

WWW.CHICAGO.EDU

WWW.CHICAGO.EDU

WWW.CHICAGO.EDU

WWW.CHICAGO.EDU

WWW.CHICAGO.EDU

WWW.CHICAGO.EDU

WWW.CHICAGO.EDU

WWW.CHICAGO.EDU

WWW.CHICAGO.EDU

WWW.CHICAGO.EDU